

# Gay Byrne

**Ceist 1** Beidh tú ag féachaint ar ball ar thuairisc faoin gcráoltóir aitheanta Gay Byrne, a fuair bás ar an gceathrú lá de mhí na Samhna. Pléigh a bhfuil ar eolas agat faoin bpearsa mór le rá seo leis an duine in aice leat.



**Ceist 2** Féach féin agus an duine in aice leat ar na focail seo a bheidh le cloisteáil sa mhír. An dtuigeann sibh iad?

1. pearsa mhór \_\_\_\_\_
2. ómós \_\_\_\_\_
3. comhghleacaithe \_\_\_\_\_
4. oifigeach airm \_\_\_\_\_
5. uaillmhianach \_\_\_\_\_
6. comhlachtaí árachais & díolacháin \_\_\_\_\_
7. b'íomaí pearsa \_\_\_\_\_
8. iomráiteach \_\_\_\_\_
9. conspóideach \_\_\_\_\_
10. broidiúil \_\_\_\_\_
11. infheistíochtaí \_\_\_\_\_
12. toghchán na huachtaránachta \_\_\_\_\_

Anois, féachaigí ar an tuairisc le feiceáil an gcuideadh sin libh. Mura bhfuil sibh cinnte faoi bhrí na bhfocal tar éis na chéad éisteachta, pléigí na focail leis an teagascóir.

**Ceist 3** Féach ar an tuairisc arís agus freagair na ceisteanna:

1. Cén aois a bhí Gay Byrne nuair a fuair sé bás?
2. Cén fáth a raibh clú agus cáil ar Gay Byrne?
3. Cén t-eolas a thugtar sa mhír faoi chúlra Gay Byrne, sula ndeachaigh sé isteach sna meáin?
4. Cad a rinne sé i ndiaidh dó éirí as a chuid oibre go hoifigiúil?
5. Cén mí-ádh a bhuail é sa bhliain 1986 agus sna blianta ina dhiaidh sin?

6. Cén fáth ar luadh na blianta 2006 agus 2011?

**Ceist 4** ‘...a bhí...’ agus ‘...dúirt..’

- A. Éist go cruinn leis an mír arís. Breac síos gach sampla den bhriathar san aimsir chaite a chloiseann tú inti.
- B. Scríobh amach na rialacha a bhaineann leis an aimsir chaite a chur in iúl.

**Ceist 5** ‘...ag cur...’

1. Cén ghné den ghramadach atá i gceist leis an sampla thuas?
2. Féach ar na habairtí seo agus cuir líne faoin ngné sin i ngach abairt:

*Tá mé ag léamh mo leabhair.  
Ní maith liom leabhair a léamh.  
Tá mé ag ól an bhainne.  
Ní maith liom bainne a ól.*

3. An féidir leat a rá cén fáth nach bhfuil deireadh na mbriathra mar an gcéanna sna samplaí thíos?

*Cleacht – cleachtadh  
Bris – briseadh*

*Fiosraigh – fiosrú  
Aimsigh – aimsiú*

**Ceist 6** Pléigh na ceisteanna leis na daoine eile i do ghrúpa:

1. Cén fáth a dtaitníonn *The Late Late Show* le muintir na hÉireann, dar leat?
2. An bhfuil an tionchar céanna ag *The Late Late Show* ar shochaí na tíre sa lá atá inniu ann is a bhí fiche bliain ó shin? Mínigh.
3. Cén cineál pearsantachta a bhí ag Gay Byrne?

## Treoracha agus Freagraí

### Ceist 1

Tabhair deis do gach beirt a bhfuil ar eolas acu faoi Gay Byrne a phlé le chéile.

### Ceist 2

1. pearsa mhór	<i>big personality, figure</i>
2. ómós	<i>homage, respect</i>
3. comhghleacaithe	<i>colleagues</i>
4. oifigeach airm	<i>army officer</i>
5. uaillmhiánach	<i>ambitious</i>
6. comhlachtaí árachais & díolacháin	<i>insurance and sales companies</i>
7. b'íomaí pearsa	<i>there were many personalities</i>
8. iomráiteach	<i>well-known</i>
9. conspóideach	<i>controversial</i>
10. broidiúil	<i>busy</i>
11. infheistíochtaí	<i>investments</i>
12. toghchán na huachtaránachta	<i>the presidential election</i>

### Ceist 3

Féach an script.

### Ceist 4

#### A.

- bhí
- chaith
- throid
- chuaigh
- fágadh
- chuir
- bhíodh
- phós
- sheas
- d'fhan
- léirigh
- go raibh
- buaileadh
- theip
- dhiúltaigh
- ghlac

#### B.

- ✓ Séimhítear fréamh an bhriathair chun an aimsir chaite a chur in iúl (cuir – chuir), ach amháin i gcás an tsaorbhriathair (cuireadh).
- ✓ Cuirtear **d'** roimh bhriathra dar tús guta nó f (ól – d'ól, fan – d'fhan), ach amháin i gcás an tsaorbhriathair (óladh, fanadh).
- ✓ Úsáidtear an mhír cheisteach **ar** chun ceist a chumadh san aimsir chaite (ar chuir?, ar fhan?).
- ✓ **Níor** an mhír dhiúltach a úsáidtear (níor chuir, níor ól).

### Ceist 5

1. An t-ainm briathartha.
2. Féach ar na habairtí seo agus cuir líne faoin ggné sin i ngach abairt:

Tá mé ag léamh mo leabhair.  
Ní maith liom leabhair a léamh.  
Tá mé ag ól an bhainne.  
Ní maith liom bainne a ól.

3. Is iad –adh agus –eadh na deirí a bhíonn ar ainm briathartha na mbriathra sa chéad réimniú. Is iad –ú agus –iú na deirí a bhíonn ar ainm briathartha na mbriathra sa dara réimniú.

**Ceist 6**

Is féidir gach beirt nó triúr a chur ag déanamh an phlé seo agus ansin cuid de na ceisteanna a phlé leis an rang iomlán.

### Eimear Ní Chonaola

Tá an craoltóir agus an phearsa mhór theilifíse Gay Byrne tar éis bháis. Cúig bliana le cois na ceithre scór a bhí sé agus bhí sé tinn le tamall. Chaith Gay Byrne beagnach dhá scór bliain ag cur an chláir teilifíse *The Late Late Show* i láthair. Agus bhíodh a chlár raidió féin aige freisin ar RTÉ. Ina measc siúd a bhfuil ómós léirithe acu dó tráthnóna tá an tUachtarán, Michael D. Higgins, an Taoiseach, Leo Varadkar agus a chomhghleacaithe in RTÉ, Ryan Tubridy agus Joe Duffy.

### Séamus Ó Scanláin

Le breis agus leathchéad bliain bhí a éadan le feiceáil agus a ghlór le cloisteáil i mórán gach uile theach sa tír. Mac le hoifigeach airm a throid sa gCéad Chogadh Mór agus máthair a bhí uailmhianach dá clann, chaith Gay Byrne tús a shaoil oibre i gcomhlachtaí árachais agus díolacháin.

Ach ansin, chuaigh sé leis na meáin – i Sasana le Granada TV agus an BBC. Faoi 1962 bhí RTÉ bunaithe agus fágadh an clár mór teilifíse *The Late Late Show* faoi láithriú Gay Byrne. B'iomaí pearsa iomráiteach cháiliúil a bhí faoi agallamh aige, cuid díobh conspóideach - leithéidí na bpolaiteoirí Pádraig Flynn agus Peter Brooke, chomh maith le Annie Murphy agus a caidreamh le Eamonn Casey. I dteannta na hoibre seo, chuir Gay Byrne mná tí na hÉireann faoi agallamh i gcomórtas náisiúnta dá leithéid agus bhíodh iomaitheoirí Rós Thrá Lí os a chomhair ar feadh na mblianta.

Ba réalta mór i gcúrsaí raidió Gay Byrne chomh maith, a chlár rialta féin aige maidineacha na seachtaine ar feadh beagnach deich mbliana fichead.

Phós sé pearsa chraoltóireachta eile, Kathleen Watkins, a sheas leis i gcónaí go dílis.

D'fhan Gay Byrne broidiúil tar éis dó éirí as a chúraimí go hoifigiúil. É ag láithriú teilifíse le *Who Wants to be a Millionaire*, *The Meaning of Life* agus *Make 'em Laugh*. Agus léirigh sé féin acmhainn grinn go minic.

Ach, níorbh aon údar grinn dó, áfach, a scéala i 1986, go raibh a chuntasóir agus a sheanchara Russell Murphy tar éis gaoth a thabhairt dá chuid airgid. Buaileadh Gay Byrne sa bpóca freisin blianta ina dhiaidh sin nuair a theip ar infheistíochtaí eile dá chuid.

Dhiúltaigh sé rith i dtoghchán na hUachtaránachta 2011. Deireadh go leor go n-éireodh leis. Ach, ghlac sé le post mar chathaoirleach ar an Údarás um Shábháilteacht ar Bhóithre ó 2006, cúis a bhí gar dá chroí féin.

Séamus Ó Scanláin, Nuacht TG4